

Sujet:

BASEL RUUMT

D'Verwaltig duet in Basel mischte,
fillt dr Grimpel jetz in Kischte.
Syt Johrzähnt sinn d'Eschtrich voll.
Jetzt wird gruunt, mir findes toll.
Mängg Beamte-Gsicht wird blaich.
Grimpel, Mischt und alte Saich
findet alles in dr Muba Blatz.
Mängg alte und vergäss'ne Schatz.
D'Lyyt hän sich um dä Plunder gschlaage,
bisse, gratzt und paggt am Graage.

Hejo, s'isch scho gwaltig, was die hän gfunde
uff Eschtrig oobe und in Käller unde:

Schrybmaschine mit und ohne Daschte,
Mottekugele fir in e Kaschte,

Bluemevaase mit droggene Maie,
uus em Styrramt Papegaie,

Liggstuehl, Bett und Luftmatratze,
glaini Händli zem am Rugge gratze,
e Seggretärin, ganz in Rage,
s'kunnt alles uss dr Chefetage.

Zwaierligleeser - kemme die am Änd
uss em Bolizey-Departemänt?

Nur die Fläsche, die kasch nit neh,
das sinn d'Spiler vom FCB.

E baar vo unsere Schugger-Rueche
hänn bym yyfrig Ummesueche
im Lohnhofkäller, ganz wyyt unde,
e Verdächtige vo nyynzähvierzig gfunde.

E Zälledyre, wo duet roschte,
stammt sicher uss em Clara-Boschte.

E Kerbli mit Basilisgge-Aier.
E Manuskript vom E.A. Mayer.

S' Theater het gfunde im-e-ne Kaschte
zwysche Goschdym und Puderquaschte,
s'Hochzytsglaid vo der Lammermoore Lucia.
Dr Striebel schreyt: "Das muess YCH ha!"

**E verblassti Foti mit em Globi,
äxgyysi, nai, es isch dr Hobi.**

**Die Schuldschyyn do - kemme die am Änd
uss unserem Finanzdepartemänt?**

**E kabutte Blocher, mir lehn en lo fligge,
und wärde-n-en äxpräss uff Zyri schigge.
Denn kenne d'Zyrcher, die liebe und helle,
ihre EG-Blocher in Kaschte stelle.**

**E-n-Ordner voll franzeesisch Gfasel.
S'sinn d'Uusbauplän vom Flugplatz Basel.**

**Im Staatsarchiv het gfunde s'Lotti
vom Schnyder Karl e Fahndigs-Foti.**

**Im Eschtrich linggs, ganz obe hinde,
het ain e Hooge kenne finde.
E zwaite Hooge, s'isch verruggt,
het sich als Schallere entbuppt.**

**Uus em Rothuus kemme hohli Kepf
und jedi Mängi alti Zepf.**

**Drmit's an der Auggtion no besser goht
verstaigere si dääglig e Regierigsroot.**

**Vogelkeefig und Muusefalle
findet me in de Källerhalle.
D'Myys sinn froh und d'Ratte-n-au,
ändlig isch e mol Rueh im Bau.**

**Vier Ordner voll, ojeimineh,
mit Routeplän vom Comité.**

**Lampe, Sireene und au Schälle,
vom Baudep no-n-e grieni Wälle.**

**Das alles und no vyl meh
hesch kenne-n-in dr Muba gseh.
D'Verwaltig isch froh, ganz furchtbar sehr.
Ändlig sind die amtliche Käller leer.
Dä Grimpel duet, mir mechte d'Neygir stille,
jetzt ney wievyyl privati Käller fille?**

D'Ladärne-Uusstellig isch vom Määntig znacht,
em 21. Hornig, bis am Mittwuch demorge, em 23. Hornig,
uff em Minschterplatz. - Mir fraien is uff Ihre Bsuech.